

Û dimenche, après misse, lou Bernicha e lou Chiroulet que-s en partadyàben ue tassote en ço de la Mariougne. Ue pause qu'abèn debisat de la plouye, dou bèt tems, dou cambie de la lue e dou trimtram de la bite-bitante ; que coumençaben de badalha.

- Sabes que poudém hè ? si dits lou Bernicha. – E dounc ? respoun l'aute.

– Adare lous grans tribalhs que soun acabats. Lou hé qu'èy à la borde, lou blat au soulè. Lous milhoc e las poumes que soun maneyats, lou rasim que madure beroy... Si nous anàbem da ue semmane à las aygues de Bagnères ? Que-m en dises ?

- Tè ! biban, qu'as rasou. Que y abèy pensat you tabé. Qu'èy ù diantre de rumatisme qui-m rougagne la came tout l'ibèr. Nou-m pot ha que déu bé déu m'ana trempa à las aygues cautes.

- E bé, qu'èy coumbengut, e, si bos, que partiram à la ffi de la semmane. La sasou dous couyès qu'èy coumençade e lous prèts que dében abé bachat hèrè. - Entenut ! si hé l'aute. E que-s desseparèn.

Lou dissàtte puch, die de marcat de Bagnères, lous dus coumpays que partin per la carrète dou mouliè. Que-s en pourtaben ù barrau de picapout de bint pichès, ù pa de garies, dus bèts poulàstres, ù cantoû de lard, ù toupî de grèch e ue beroye tranche de yamboû. Arribats à Bagnères, que troubèn ue brabe hémne, bielhe cousinèrè, qui-us dé lou lòtye e qui-s carguè d'ous ha còse lou frico, per bint tàryes cadu per die, tout coumprés. La brabe Choune (qu'èy atau qui-s aperabe) n'ère pas, si boulet, ù courdoû blu dous méy fis ni dous més eslincois. Qu'abè la tignasse drin més espeluhardade que de rasoû e n'ère pas estouan de trouba de quoan en quoan quauque péu blanc au poutàdye. Drin courte de biste, que dechabe bèt cop tabé càde ue lauquète à la salade. Més aném, lous noustes aygassès nou y espiaben pas de tan près e, sounque que y abousse hartère, qu'èren counténs. Dab aco, la brabe Choune qu'ous soégnè coume dus cardís en cuyole e qua passèn oéyt dies à Bagnères dous méy agradius.